

四庫全書

集部

欽定四庫全書

萬首唐人絕句卷八

宋 洪邁 編

七言

贈商亮

戴叔倫

日日河邊見水流  
傷春未已復悲秋  
山中舊宅無人住  
來往風塵共白頭

夜發袁江寄李潁川劉侍御

半夜回舟入楚鄉  
月明山水共蒼蒼  
孤猿更叫秋風裏  
不是愁人亦斷腸

對酒

三重江水萬重山  
山裏春風度日閒  
且向白雲求一醉  
莫教愁夢到鄉關

對月答袁明府

山下孤城月上遲  
相留一醉本無期  
明年此夕遊何處  
縱有清光知對誰

送上饒嚴明府攝玉山

家在故林吳楚間  
水為溪水玉為山  
更將舊政化隣邑  
遙見逋人相逐還

聽歌回

秋風裏許杏花開  
杏樹傍邊醉客來  
共待客深聽一曲  
醒人騎馬斷腸回

酬駱侍御荅詩

風傳畫閣空知曉  
雨濕江城不見春  
堆案遶牀君莫怪

已經愁思古時人

送孫直遊郴州

孤舟上水過湘沅  
桂嶺南枝花正繁  
行客自知心有托  
不聞驚浪與啼猿

麓山寺會送尹秀才

湖上逢君亦不閒  
暫將離別到深山  
飄蓬驚鳥那自定  
強欲相留雲樹間

送董顒

霜鴈羣飛下楚田  
羈人掩淚望秦天  
君行江海無定所  
別後相思何處邊

別張員外

木葉紛紛湘水濱  
此中何事往頻頻  
臨風自笑歸時晚  
更送浮雲逐故人

送張評事

城郭喧喧爭送遠  
危梁裊裊渡東津  
楊花展轉引征騎  
莫怪山中多看人

送呂少府

共醉流芳獨歸去故園高士日相親  
深山古路無楊柳折取桐花寄遠人

送人遊嶺南

少別華陽萬里遊近南風景不曾秋  
紅芳綠筍是行路縱有啼猿聽却幽

妻亡後別妻弟

楊柳青青滿路垂贈行惟折古松枝  
停舟一對湘江哭

哭罷無言君自知

和崔法曹建溪聞猿

曾向巫山峽裏行  
羈猿一叫一回驚  
聞道建溪腸欲斷  
的知斷着第三聲

湘南即事

盧橘花開楓葉衰  
出門何處望京師  
沅湘日夜東流去  
不為愁人住少時

代書寄京洛舊遊



今年十月溫風起湘水悠悠生白蘋欲寄遠書還不敢  
却愁驚動故鄉人

蘄州行營作

蘄水城西向北看桃花落盡柳花殘朱旗半捲山川小  
白馬連嘶草樹寒

題武當逸禪師蘭若

我身本似遠行客況是亂時多病身經山涉水向何處  
羞見竹林禪定人

穀城逢楊評事

遠自五陵獨竄身  
筑陽山中歸路新  
橫流夜長不得渡  
駐馬荒亭逢故人

聽韓使君美人歌

仙人此夜忽凌波  
更唱瑤臺一遍歌  
嫁與將軍天上住  
人間可得再相過

雪中聽箏

楊巨源

玉柱泠泠對寒雪  
清商怨徵聲何切  
誰憐楚客向隅時

一片愁心與絃絕

盧龍塞行送韋掌記二首

雨雪紛紛黑水外行人共指盧龍塞萬里飛沙壓鼓聲

三軍殺氣凝旌旆

陳琳書記本翩翩料敵能兵奪酒泉聖主好文兼好武  
封侯莫比漢皇年

題五老峯下費君書院

解向花間栽碧松門前不負老人峯已將心事隨身隱

認得溪雲第幾重

僧院聽琴

禪心何妨在玉琴  
真僧不見聽時心  
離聲怨調秋堂夕  
雲向蒼梧湘水深

和武相公春曉聞鶯

語恨飛遲天欲明  
殷勤似訴有餘情  
仁風已及芳菲節  
猶向花溪鳴幾聲

唐昌觀玉藥花

晴空素艷照霞新  
香灑天風不到塵  
持贈昔聞將白雪  
藥珠宮上玉花春

山中主人

十里青山有一家  
翠屏深處更添霞  
若為說得溪中事  
錦石和烟四面花

和練秀才楊柳

水邊楊柳麴煙絲  
立馬煩君折一枝  
唯有春風最相惜  
殷勤肯向手中吹

太原贈李屬侍御

路入桑乾塞鴈飛  
棗郎年少有光輝  
春風走馬三千里  
不廢看花君繡衣

崔娘詩

清潤潘郎玉不如  
中庭蕙草雪消初  
風流才子多春思  
腸斷蕭娘一紙書

灞岸柳

楊柳含烟灞岸春  
年年攀折為行人  
好風儻借低枝便

莫遣青絲掃路塵

題雲師山房

雲公蘭若深山裏  
月明松殿微風起  
試問空門清淨心  
蓮花不着秋潭水

城東早春

詩家清景在新春  
綠柳纔黃半未勻  
若待上林花似錦  
出門俱是看花人

秋日登亭贈薛侍御

潦倒從軍何取益東西走馬暫同遊  
梁王舊客皆能賦今日因何獨怨秋

石水詞

銀罌深鑱貯清光無限來人不得嘗  
知共金丹爭氣力一盃全勝五雲漿

荅振武李逢吉判官

近來時輩都無興把酒皆言肺病同  
唯有單于李評事不將華髮負春風



宮燕詞

毛衣侶錦語如絃日煥爭高綺陌天幾處野花留不得  
雙雙飛向御爐前

贈崔駙馬

百尺梧桐畫閣齊簫聲落處翠雲低平陽不惜黃金埒  
細雨花驄踏作泥

聽李憑彈箏篴二首

聽奏繁絃玉殿清風傳曲度禁林明君王聽樂梨園煥

翻到雲間第幾聲

花咽嬌鶯玉漱泉  
名高半在御筵前  
漢王欲助人間樂  
從遣新聲墜九天

臥水看花

一樹紅花映綠波  
清明騎馬好經過  
今朝幾許風吹落  
聞道蕭郎最惜多

觀妓人入道二首

荀令歌鐘北里亭  
翠娥紅粉敞雲屏  
舞衣施盡餘香在

今日花前學誦經

碧玉芳年事冠軍清歌空得隔花聞  
春來削髮芙蓉寺  
蟬髻臨風隨綠雲

白櫻桃

王母堦前種幾株水晶簾內看如無  
只應漢武金盤上  
寫得珊珊白露珠

白櫻樹

記得花開雪滿枝和風和蝶帶花移  
只今花落遊蜂去

空作主人惆悵詩

聞友人看花

朱慶餘

尋花不問春深淺縱是殘紅也入詩  
每箇樹邊行一匝  
誰家園裏最多時

陪韓中丞宴

不飲酒

老大無成仍足病縱聽絲竹亦無歡  
高情太守容閒坐  
借與青山盡日看

嶺南路

越嶺向南風景路人人傳說到京城經時來往不踏雪  
盡在刺桐花上行

種花

憶昔兩京官道上可憐桃李盡成蹊不知誰作尋花使  
空記玄宗遣種時

題仙遊寺

石抱龍堂蘚石乾山遮白日寺門寒長松瀑布饒奇狀  
曾有仙人駐鶴看

廬江途中遇雪

蘆葦聲多葉滿陂  
濕雲連野見山稀  
遙知將吏相逢處  
半是春城賀雪歸

公子行

閒蹤結客冶游時  
忘却江樓薄暮期  
醉上黃金隄上去  
馬鞭捎斷綠楊絲

登望雲亭招友

日日恐無雲可望  
不辭逐靜望來頻  
共知亭下眠雲遠

解到上頭能幾人

寄劉少府

唯愛圖書兼古器在官猶似未離貧  
更聞縣去青山遠稱與詩人作主人

閨意上張水部

洞房昨夜停紅燭待曉堂前拜舅姑  
妝罷低聲問夫婿畫眉深淺入時無

採蓮

隔烟花草遠濛濛恨箇來時路不同正是停橈相遇處  
鴛鴦飛出急流中

都門晚望

綠槐花墮御溝邊步出都門雨後天日暮野人耕種罷  
烽樓原上一條烟

尋山僧

吟背春城出草遲天晴紫閣赴僧期山邊樹下行人少  
一派清泉日午時



西亭晚宴

蟲聲已盡菊花乾  
五老松陰向晚寒  
對酒看山俱惜去  
不知殘日下闌干

與一二禪師題玠寺主院

杖屨相隨在處便  
不唯空寄上方眠  
歸時亦取湖邊去  
晚映楓林共上船

舜井

碧甃磷磷不記年  
青蘿鎖在小山顛  
向來下視千山水

疑是蒼梧萬里天

宮中詞

寂寂花時閉院門  
美人相並立瓊軒  
含情欲說宮中事  
鸚鵡前頭不敢言

古觀

古觀曾過知不遠  
花藏石室杳難尋  
泉邊白鹿聞人語  
看過天壇恨入深

夏口送舍人赴杭州

金匱要略卷八  
卷八  
豈知鸚鵡洲邊路得見鳳凰池上人從此不同諸客禮  
故鄉南與郡城鄰

商州王中丞留喫枳殼

方物就中名最遠只應愈疾味偏佳若教盡喫人人與  
采盡商山枳殼花

寄招胡明府

語低清貌似休糧稱着朱衣入草堂消暑近來無別物  
桂陰當午滿繩牀

登玄都閣

野色晴宜上閣看  
樹陰遙映御溝寒  
豪家舊宅無人住  
空見朱門鎖牡丹

贈鳳翔柳司錄

杏園北寺題名日  
數到如今四十年  
點檢生涯與官職  
一莖野竹在身邊

榜曲

荷花明滅水烟空  
惆悵來時徑不同  
欲到前州堪入處

鴛鴦飛出碧流中

逢山人

星月相逢現此身自然無跡又無塵  
秋來若向金天會便是青蓮葉上人

過耶溪

春溪繚繞出無窮兩岸桃花正好風  
恰是扁舟堪入處鴛鴦飛起碧流中

九日送別

王之渙

薊庭蕭瑟故人稀  
何處登高且送歸  
今日暫同芳菊酒  
明朝應作斷蓬飛

涼州詞二首

黃河遠上白雲間  
一片孤城萬仞山  
羌笛何須怨楊柳  
春光不度玉門關

單于北望拂雲堆  
殺馬登壇祭幾回  
漢家天子今神武  
不肯和親歸去來

宴詞

長堤春水綠悠悠  
畎入漳河一道流  
莫聽聲聲歸去棹  
桃溪殘處不勝舟

惆悵詞十二首

八蠶薄絮鴛衾綺  
半夜佳期並枕眠  
鐘動紅娘喚歸去  
對人勻淚拾金鈿

李夫人病已經秋  
漢武看來不舉頭  
得所穠華消歇盡  
楚魂湘血一生休

謝家池館花籠月  
蕭寺房廊竹颭風  
半夜酒醒憑檻立

所思多在別離中

隋師戰艦欲亡陳國破應難保此身訣別徐郎淚如雨  
鑑鸞分後屬何人

七夕瓊筵隨事陳兼花連蒂共傷神蜀王殿裏三更月  
不見驪山私語人

夜寒春病不勝懷玉瘦花啼萬事乖薄倖檀郎斷芳信  
驚嗟猶夢合歡鞋

嗚咽離聲管吹秋妾身今日為君休齊奴不說平生事



忍看花枝謝玉樓

青絲一路墮雲鬟金剪刀鳴不忍看持謝君王寄幽怨  
可能從此住人間

陳宮興廢事難期三閣空餘綠草基狎客淪亡麗華死  
他年江令獨來時

晨肇重來路已迷碧桃花謝武陵溪山目斷無尋處  
流水潺湲日漸西

少卿降北子卿還朔野離觴慘別顏却到茂陵惟一慟

節毛零落髻毛斑

夢裡分明入漢宮  
覺來燈背錦屏空  
紫臺月落關山曉  
腸斷君恩信盡工

送僧二首

馬戴

親在平陽憶久歸  
洪河雨漲出關遲  
獨過舊寺人稀識  
一一松杉老別時

龕中古樹自持行  
樹下禪牀坐一生  
來往白雲知歲久  
滿山猿鳥會經聲

贈友人邊遊

有客新從絕塞回  
自言曾上李陵臺  
尊前話盡北風起  
秋色蕭條胡鴈來

山中作

屐齒無泥竹策輕  
莓苔梯滑夜難行  
獨開石室松門裏  
月照前山空水聲

出塞詞

金帶連環束戰袍  
馬頭充雪度臨洮  
卷旗夜却單于帳

亂斫胡兒缺寶刀

寄雲臺觀田秀才

雪壓松枝拂石窓幽人獨坐鶴成雙  
晚來漱齒敲水渚閒讀仙書倚翠幢

邊上送侍御鞠獄回

獄成冤雪晚雲開  
豸角威清塞鴈回  
飛將送迎遙避馬  
離亭不敢勸金盃

射鵰騎

蕃面將軍着鼠裘酣歌衝雪在邊州獵過黑山猶走馬  
寒雕射落不回頭

聞玉藥院真人降二首

嚴休復

終日齋心禱玉宸魂消眼冷未逢真不如滿樹瓊瑤藥  
笑殺藏花洞裏人

羽車潛下玉龜山塵世何由覩舜顏唯有無情枝上雪  
好風吹綴綠雲鬟

萬首唐人絕句卷八

欽定四庫全書

萬首唐人絕句卷九

宋 洪邁 編

七言

和裴校書鷺鷥飛

元稹

鷺鷥鷺鷥何處飛  
鷗鷺雀噪難久依  
清江見底草堂在  
一點白光終不歸

夜池

荷葉團圓莖削削綠萍面上紅衣落滿地月明思啼蟹  
高屋無人風張幕

寒食日毛空路示姪

我昔提孩從我兄我今衰白爾初成分明記取原頭路  
百世長須此路行

別孫村老人

年年漸看老人稀欲別孫翁淚滿衣未死不知何處去  
此身終向此原歸

和樂天劉家花

閒坊靜曲同消日  
淚草傷花不為春  
遍問舊交零落盡  
十人纔有兩三人

褒城驛二首

客州詩句在褒城  
幾度經過眼漸明  
今日重看滿衫淚  
可憐名字已前生

憶昔萬株梨映竹  
遇逢黃令醉殘春  
梨枯竹盡黃令死  
今日載來衰病身



和樂天夢亡友劉太白同遊二首

君詩昨日到通州萬里知君一夢劉閒坐思量小來事  
祇應元是夢中遊

老來東郡復西州行處生塵為喪劉縱使劉君魂魄在  
也應至死不同遊

醉醒

積善坊中前度飲謝家諸婢笑扶行今宵還似當時醉  
半夜覺來聞笑聲

感夢

行吟坐嘆知何極  
影絕魂消動隔年  
今夜商山館中夢  
分明同在後堂前

六年春遣懷八首

傷禽我是籠中鶴  
沉劍君來泉下龍  
重續猶存孤枕在  
春衫無復舊裁縫

檢得舊書三四紙  
高低濶狹但成行  
自言併食尋高事  
唯念山深驛路長

公無渡河音響絕已隔前春復去秋今日閒窓拂塵土  
殘絃猶迸鈿箏篴

婢僕矚君餘服用嬌癡稚女遶牀行玉梳鈿朶香醪解  
盡日風吹瑤瑁箏

伴客消愁長日飲偶然乘興便醺醺怪來醒後傍人泣  
醉裏時時錯問君

我隨楚澤波中梗君作咸陽泉下泥百事無心值寒食  
身將稚女帳前啼

童稚癡狂撩亂走綵毬花仗滿堂前病身一到總帷下  
還向臨階背日眠

小於潘岳頭先白學取莊周淚莫多止竟悲君須自省  
川流前後各風波

答友封

荀令香消潘簾空悼亡詩滿舊屏風扶牀小女君先識  
應為些些自外翁

夢成之

燭暗船風獨夢驚  
夢君頻問向南行  
覺來不語到明坐  
一夜洞庭湖水聲

哭小女降真

雨點輕漚風復驚  
偶來何事去何情  
浮生未到無生地  
暫到人間又一生

哭女樊

秋天淨綠月分明  
何事巴猿不賸鳴  
應是一聲腸斷去  
不容啼到第三聲

妻滿月日相唁

十月辛勤一月悲今朝相見淚淋漓  
狂花落盡莫惆悵猶勝因花壓折枝

杏園

浩浩長安車馬塵狂風吹送每年春  
門前本是空虛界何是栽花誤世人

菊花

秋叢遶舍似陶家遍籬邊日漸斜  
不是花中偏愛菊

此花開盡更無花

尋西明寺僧不在

春來日日到西林  
飛錫經行不可尋  
蓮池舊是無波水  
莫逐狂風起浪心

與吳侍御春遊

蒼龍闕下陪驄馬  
紫閣峰頭見白雲  
滿眼流光隨日度  
今朝花落更紛紛

晚春

畫靜簾疎鶯語頻  
雙雙鬬雀動堦塵  
柴扉日暮隨風掩  
落盡閒花不見人

先醉

今日尊前敗飲名  
三杯未盡不能傾  
怪來花下常先醉  
半是春風蕩酒情

獨醉

一樹芳菲也當春  
慢隨車馬擁行塵  
桃花解笑鶯能語  
自醉自眠那藉人



宿醉

風引春心不自由等閒衝席飲多籌朝來始向花前覺  
度却醒時一夜愁

懼醉

聞道秋來却夜寒不辭泥水為盃盤殷勤懼醉有深意  
愁到醉時燈火闌

羨醉

綺陌高樓競醉眠共期憔悴不相憐也應自有尋春日

虛度而今正少年

憶醉

自嘆旅人行意速每嫌杯酒緩歸期今朝偏遇醒時別  
淚落風前憶醉時

病醉

醉伴見儂因病酒道儂無酒不相窺那知下藥還沽底  
人去人來剩一卮

擬醉

九月閒宵初向火一罇清酒始行杯  
憐君城外遙相憶  
冒雨衝泥黑地來

勸醉

寶家能釀銷愁酒但是愁人便與銷  
顧我共君俱寂寞  
只應連夜復連朝

任醉

本怕酒醉渾不飲因君相勸覺情來  
殷勤滿酌從聽醉  
乍可欲醒還一杯

同醉

栢樹臺中推事人  
杏花壇上煉真形  
心源一種閒如水  
同醉櫻桃樹下春

狂醉

一自栢臺為御史  
二年辜負兩京春  
峴亭今日顛狂醉  
舞引紅娘亂打人

伴僧行

春來求事百無成  
因向愁中識道情  
花滿杏園千萬樹

幾人能伴老僧行

古寺

古寺春餘日半斜  
竹風蕭爽勝人家  
花時不到有花院  
意在尋僧不在花

定僧

落魄閒行不著家  
偏尋春寺賞年華  
禪僧偶向花前定  
滿樹狂風滿樹花

觀心處

蒲座喧喧笑語頻獨憐方丈了無塵  
燈前便有觀心處要似觀心有幾人

智度師二首

四十年前馬上飛功名藏盡擁禪衣  
石榴園下擒生處獨自閒行獨自歸

三陷思明三突圍鐵衣拋盡納禪衣  
天津橋上無人識閒凭欄杆望落輝

西明寺牡丹

金瓶梅詞話卷九  
花向琉璃池上生光風炫轉紫雲英自從天女盤中見  
直至今朝眼更明

憶楊十二

去時芍藥纔開贈看却殘花已度春只為情深花愴別  
等閒相見莫相親

送復夢赴韋令幕

世上如今重檢身吾徒耽酒作狂人西曹舊事多持法  
切莫吐他丞相茵

送劉太白

洛陽大抵居人少從善坊西最寂寥想到劉君獨騎馬  
古堤秋樹隔中橋

奉誠園

蕭相深誠奉至尊舊居求作奉誠園秋來古巷無人掃  
樹滿空牆閉戟門

與太白同之東洛至櫟陽太白染疾駐行予九  
月二十五日至華嶽寺雪後望山



共作洛陽千里伴老劉因疾駐行軒今朝獨自山前立  
雪滿山峰倚寺門

野狐泉柳林

去日野狐泉上柳紫芽初綻拂眉低秋來寥落驚風雨  
葉滿空林踏作泥

酬胡三憑人問牡丹

竊見胡三問牡丹為言依舊滿西欄花時何處偏相憶  
寥落衰紅雨後看

酬樂天秋興見贈末句云莫怪獨吟秋興苦比

君校近二毛年

勸君休作悲秋賦白髮如星也任垂畢竟百年同是夢  
長年何異少何為

雪後宿同軌店上法護寺鐘樓望月

蒲山殘雪蒲山風野寺無門院院空烟火漸稀孤店靜  
月明深夜古樓中

陪韋尚書文歸履信宅

紫垣騶騎入華居公子文衣護錦輿眠閱書生復何事  
也騎羸馬從尚書

永真二年正月二日上御丹鳳樓赦天下予與  
李公垂庾順之間行曲江不及盛觀

春來饒夢慵朝起不看千官擁畫樓却著閒行是忙事  
數人同傍曲江頭

韋居守晚歲常言退休之志因署其居曰大隱  
洞命予賦詩

謝公潜有東山意已向朱門啟洞門大隱猶疑戀朝市  
不如名作罷歸園

贈李十二牡丹花片

鶯澁餘聲絮墮風牡丹花盡葉成叢可憐顏色經年別  
收取朱欄一片紅

題李十一修行里居壁

雲闕朝回塵騎合杏花春盡曲江閒憐君雖在城中住  
不隔人家便是山

靖安窮居

喧靜不由居遠近大都車馬就權門野人住處無名利  
草滿空堦樹滿園

贈樂天

等閒相見銷長日也有閒時更學琴不是眼前無外物  
不關心事不經心

駱口驛二首

郵亭壁上數行字崔李題名王白詩盡日無人共言語

不離牆下至行時

二星徼外通蠻服五夜燈前草御文我到東川恰相半  
向南看月北看雲

清明日

當年寒食好風輕觸處相隨取次行今日清明漢江上  
一身騎馬縣官迎

亞枝紅

平陽池上亞枝紅悵望山郵是事同還向萬竿深竹裏

一枝渾卧碧流中

梁州夢

夢君同遶曲江頭也向慈恩院院遊  
亭吏呼人排去馬忽驚身在古梁州

江上行

悶見漢江流不息悠悠漫漫竟何成  
江流不語意相問何事遠來江上行

漢江上笛

少年為寫遊梁賦最說漢江聞笛愁今夜聽時在何處  
月明西縣驛南樓

郵亭月

君多務實我多情大抵偏嗔步月明今夜山郵與蠻瘴  
君應堅卧我還行

嘉陵驛二首

嘉陵驛上空牀客一夜嘉陵江水聲仍對牆南滿山樹  
野花撩亂月朧明



牆外花枝壓短牆月明還照半張牀無人會得此時意  
一夜獨眠西畔廊

百牢關

嘉陵江上萬重山何事臨江一破顏自笑只緣人敬仲  
等閒身度百牢關

江花落

日暮嘉陵江水東梨花萬片逐江風江花何處最腸斷  
半落江流半在空

嘉陵江二首

秦人惟識秦中水，長想吳江與蜀江。  
今日嘉川驛樓下，可憐如練遶明窓。

千里嘉陵江水聲，何年重遶此江行。  
只應添得清宵夢，時見蒲江秋月明。

西縣驛

去時樓上清明夜，月照樓前撩亂花。  
今日成陰復成子，可憐春盡未還家。

望喜驛

滿眼文書堆案邊  
眼昏偷得暫時眠  
子規驚覺燈又滅  
一道月光橫枕前

好時節

身騎驄馬峩峩下  
面帶霜威卓氏前  
虛度東川好時節  
酒樓元被蜀兒眠

夜深行

夜深猶自遶江行  
震地江聲似鼓聲  
漸見戍樓疑近驛

百牢關吏火前迎

望驛臺

可憐三月三旬足  
悵望江邊望驛臺  
料得孟光今日語  
不曾春盡不歸來

封書

鶴臺南望白雲關  
城市猶存暫一還  
書出步虛三百韻  
藥珠文字在人間

仁風李著作園醉後寄李十

朧明春月照花枝  
花下鶯聲似管兒  
却笑西京李員外  
五更騎馬趁朝時

燈影

洛陽晝夜無車馬  
漫掛紅紗滿樹頭  
見說平時燈影裏  
玄宗潛伴太真遊

書樂天紙

金鑾殿裏書殘紙  
乞與荊州元判司  
不忍拈將等閒用  
半封京信半題詩

送元穎杜君

江上五年同送客與君常羨北歸人  
今朝又送君先去  
千里洛陽城裏塵

酬李甫見贈十首

宋玉悲秋續楚詞陰鏗官慢足閒詩  
親情書札相安慰  
多道蕭何作判司

杜甫天才頗絕倫每尋詩卷似情親  
憐渠直道當時語  
不著心源傍古人

千歲荒狂任博徒，援莎五木擲臬盧。  
野詩良輔偏伶假，長借金鞍迓酒胡。

曾經倬立侍丹墀，綻藥宮花拂面枝。  
雉尾扇開朝日出，柘黃衫對碧霄垂。

一自低心翰墨場，箭韋拋盡負書囊。  
近來兼愛休糧藥，栢葉莎羅雜豆黃。

莫笑風塵滿病顏，此生元在有無間。  
卷舒蓮葉終難濕，去住雲心一種閒。

無事拋棋侵虎口幾時開眼復聯行終須殺盡緣邊敵  
四面通流掩太荒

原憲甘貧每自開子春傷足少人哀巷南唯有陳居士  
時學文殊一問來

每識閒人如未識與君相識便相憐經旬不解來過宿  
忍見空牀夜夜眠

開拆新詩展大璫明珠炫轉玉音浮酬君十首三更坐  
減却當時半夜愁



和樂天招錢蔚章看山

碧落招邀閒曠望  
黃金城外玉方壺  
人間還有大江海  
萬里烟波天上無

折花枝送行

櫻桃花下送君時  
一寸春心逐折枝  
別後相思最多處  
千株萬片遶林垂

萬首唐人絕句卷九

欽定四庫全書

萬首唐人絕句卷十

宋 洪邁 編

七言

寄劉頗二首

元稹

平生嗜酒顛狂甚不許諸公占丈夫  
唯愛劉君一片膽  
近來還敢似人無

前年碣石烟塵起共看官軍過洛城  
無限公卿因戰得

與君依舊綠衫行

晨起送使病不能行因過王十一館居二首

自笑今朝誤夙興逢他御史瘡相仍過君未起房門掩  
深映寒窓一盞燈

密宇深房小火爐飯香魚熟近中厨野人愛靜仍耽寢  
自問黃昏肯去無

送孫勝

桐花暗淡柳惺惚池帶輕波柳帶風今日與君臨水別

可憐春盡宋亭中

遠望

滿眼傷心冬景和一山紅樹寺邊多仲宣無限思鄉淚  
漳水東流碧玉波

陪張湖南晏望岳樓

稹為監察御史  
張中丞知權事

觀象樓前奉末班絳峰只似殿亭間今日高樓重陪晏  
雨籠衡岳是南山

岳陽樓

岳陽樓上日銜窓影到深潭赤玉幢悵望殘春萬般意  
滿櫺湖水入西江

寄庾敬休

小來同在曲江頭不省春時不共遊今日江風好暄暖  
可憐春盡古湘州

買花栽二首

買得山花一兩栽離鄉別土易摧隤欲知北客留南意  
看取南花北地來

南花北地種應難且向船中盡日看縱使將來眼前死  
猶勝拋擲在空欄

宿石磯

石磯江水夜潺湲半夜江風引杜鵑燈暗酒醒顛倒枕  
五更斜月入空船

桐花

去日桐花半桐葉別來桐樹老桐孫城中過盡無窮事  
白髮滿頭歸故園

西歸十二首

雙堠頻頻減去程  
漸知身得近京城  
春來愛有歸鄉夢  
一半猶疑夢裏行

五年江上損容顏  
今日春風到武關  
兩紙京書臨水讀  
小桃花樹滿商山

獨歸諫院韋丞相  
共貶河南亞大夫  
今日還鄉獨憔悴  
幾人憐見白髭鬚

只去長安六日期  
多應及得杏花時  
春明門外誰相待

不夢閒人夢酒卮

白頭歸舍意如何  
賀處無窮弔亦多  
左降去時裴相宅  
舊來車馬幾人過

還鄉何用淚沾襟  
一半雲霄一半沉  
世事慚多饒悵望  
舊曾行處便傷心

閒遊寺觀從容到  
遍問親知次第尋  
腸斷裴家光德宅  
無人掃地戟門深

一世營營死是休  
生前無事定無由  
不知山下東流水



何事長須日夜流

今朝西渡丹河水心寄丹河無限愁若到庄前竹園下  
殷勤為遶故山流

寒窓風雪擁深爐彼此相傷指白鬚一夜思量十年事  
幾人強健幾人無

雲覆藍橋雪滿溪須臾便與碧峰齊風迴麵市連天合  
凍壓花枝著水低

寒花帶雪滿山腰著柳冰珠滿碧條天色漸明回一望

玉塵隨馬渡藍橋

小碎

小碎詩篇取次書等閒題柱意何如諸郎到處相應問  
留取三行代鯉魚

和樂天高相宅

莫愁已去無窮事漫苦如今有恨身二百年來城裏宅  
一家知換幾多人

和樂天仇家酒

金剛經疏 卷十  
病嗟酒戶年年減老覺塵機漸漸深飲罷醒餘更惆悵  
不如閒事不經心

和樂天贈雲寂僧

欲離煩惱三千界不在禪門八萬條心火自生還自滅  
雲師無路與君銷

澧西別

樂天傳載樊宗憲李景信兩秀  
才姪谷三月三十日相餞送

今朝相送自同遊酒語詩情替別愁忽到澧西總回去  
一身騎馬向通州

寄曇嵩寂三上人

長學對治思苦處偏將死苦教人間今因為說無生死  
無可對治心更閒

題漫天嶺智藏師蘭若

僧云住此  
二十八年

僧臨大道閱浮生來往憧憧利與名二十八年何限客  
不曾閒見一人行

蒼溪縣寄揚州兄弟

蒼溪縣下嘉陵水入峽穿江到海流憑仗鯉魚將遠信

雁回時節到揚州

長灘夢李紳

孤吟獨寢意千般  
合眼逢君一夜歡  
慚愧夢魂無遠近  
不辭風雨到長灘

見樂天詩

通州到日日平西  
江館無人虎印泥  
忽向破簷殘漏處  
見君詩在柱心題

聞樂天受江州司馬

殘燈無焰影幢幢此夕聞君謫九江垂死病中仍悵望  
暗風吹雨入寒窓

歲日贈去非

君思曲水嗟身老我望通州感道窮同入新年兩行淚  
白頭翁坐說城中

雨聲

風吹竹葉休還動雨點荷心暗復鳴曾向西江船上宿  
慣聞寒夜滴蓬聲

欽定四庫全書

萬首唐人絕句  
卷十

七

奉和滎陽公離筵作

南郡生徒辭絳帳東山妓樂擁紅旌  
鈞天排比簫韶待猶顧人間有別情

嘉陵水

古時應是山頭水自古流來江路深  
若使江流會人意也應知我遠來心

閬州開元寺壁題樂天詩

憶君無計寫君詩寫盡千行說向誰  
題在閬州東寺壁

幾時知是見君時

憑李忠州寄書樂天

萬里寄書將出峽却憑巫峽寄江州傷心最是江頭月  
莫把書將上庾樓

得樂天書

遠信入門先有淚妻驚女哭問何如尋常不省曾如此  
應是江州司馬書

寄白樂天



無身尚擬魂相就身在那無夢往還直到他身亦相覓  
不能空寄樹中環

酬知退

終須修到無修處聞盡聲聞始不聞莫著妄心銷彼我  
我心無我亦無君

通州

平生欲得山中住天與通州遶郡山睡到日西無一事  
月儲三萬買教閒

喜李十一景信到

何事相逢翻有淚  
念君緣我到通州  
留君剩住君須住  
我不自由君自由

與李十一夜飲

寒夜燈前賴酒壺  
與君相對興猶孤  
忠州刺史應閒卧  
江水猿聲睡得無

贈李十一

淮水連年起戰塵  
油旌三換一何頻  
共君前後俱從事

羞見功名與別人

寒食日

今年寒食好風流此日一家同出遊  
碧水青山無限思  
莫將心道是涪州

別李十一五絕

巴南分與親情別不料與君牀並頭  
為我遠來休悵望  
折君災難是通州

京城每與閒人別猶自傷心與白頭  
今日別君心更苦

別君緣是在通州

萬里尚能來遠道一程那忍便分頭  
鳥籠貲檻君應會  
十步向前非我州

來時見我江南岸今日送君江上頭  
別後料添新夢寐  
虎驚蛇伏是通州

聞君欲去潛銷骨一夜暗添新白頭  
明朝別後應腸斷  
獨棹破船歸到州

酬樂天醉別

前回一去五年別  
又知何日回  
好住樂天休悵望  
匹如元不到京來

酬樂天雨後見憶

雨滑危梁性命愁  
差池一步一生休  
黃泉便是通州郡  
漸入深泥漸到州

和樂天題王家亭子

風吹筍籊飄紅砌  
雨打桐花蓋綠莎  
都大資人無暇日  
泛池全少買池多

酬樂天頻夢微之

山水萬重書斷絕  
念君憐我夢相聞  
我今因病魂顛倒  
唯夢閒人不夢君

琵琶

學語胡兒撼玉鈴  
甘州破裏最星星  
使君自恨常多事  
不得工夫夜夜聽

春詞

山翠湖光似欲流  
蜂聲鳥思却堪愁  
西施顏色今何在

但看春風百草頭

酬樂天舟泊夜讀微之詩

知君暗泊西江岸  
讀我閒詩欲到明  
今夜通州還不睡  
滿山風雨杜鵑聲

酬樂天武關南見微之題山石榴花詩

比因酬贈為花時  
不為君行不復知  
又更幾年還共到  
滿牆塵土兩篇詩

酬樂天寄生衣

秋茅處處流痰瘡夜鳥聲聲哭瘴雲羸骨不勝纖細物  
欲將文服却還君

酬樂天三月三日見寄

常年此日花前醉今日花前病裏銷獨倚破簾閒悵望  
可憐虛度好春朝

瘴塞

瘴塞巴山哭鳥悲紅粧少婦歛啼眉殷勤奉藥來相勸  
云是前年欲病時



紅荊

庭中栽得紅荊樹十月花開不待春直到孩提盡驚怪  
一家同是北來人

黃草峽聽柔之琴二首

胡笳夜奏塞聲寒是我鄉音聽漸難料得小來辛苦學  
又應知向峽中彈

別鶴淒清覺露寒離聲漸咽命雛難憐君伴我涪州宿  
猶有心情徹夜彈

書劍

渝江劍刃皆歐冶巴吏書蹤盡子雲  
唯我心知有來處  
泊船黃草夜思君

別毅郎二首

爾爺只為一盃酒此別那知死與生  
兒有何辜纔七歲  
亦教兒作瘴江行

愛惜爾爺唯有我我今憔悴望何人  
傷心自比籠中鶴  
剪盡羽翎愁到身

自責

犀帶金魚束紫袍不能將命報分毫  
他時得見牛常侍為爾君前捧佩刀

送公度之福建

棠陰猶在建康磯此去那論是與非  
若見白頭須盡敬恐曾江岸識胡威

喜五兄自泗州至

眼中三十年來淚一望雲南一度垂  
慚愧臨淮李常侍

達教形影暫相隨

杏花

常年出入古銀臺每怪春風例早回  
慚愧杏園行在景同州園裏也先開

第三歲日詠春風憑楊員外寄長安柳

三日春風已有情拂人頭面稍憐輕  
殷勤為報長安柳莫惜枝條動軟聲

聽妻彈別鶴操

別鶴聲聲怨夜弦聞君此奏欲潛然商瞿五十知無子  
便付琴書與仲宣

贈樂天

莫言隣境易經過彼此分符欲奈何垂老相逢暫離別  
白頭期限各無多

重贈

休遣玲瓏唱我詩我詩多是別君詞明朝又向江頭別  
月落潮平是去時

別後西陵晚眺

晚日未拋詩筆硯夕陽空望郡樓臺  
與君後會知何日  
不似潮頭暮却回

酬樂天重寄別

却報君侯聽苦詞  
老頭拋我欲何之  
武牢關外雖分手  
不似如今衰白時

寄浙西李大夫四首

柳眼梅心漸欲春  
白頭西望憶何人  
金陵太守曾相伴

共踏銀臺一路塵

藥珠深處少人知  
網索西臨太液池  
浴殿曉開天語後  
步廊騎馬笑相隨

禁林同直話交情  
無夜無曾不到明  
最憶西樓人靜後  
玉宸鍾磬兩三聲

由來鵬化便圖南  
浙右誰雄我未甘  
早渡西江好歸去  
莫拋舟楫滯春潭

爲樂天自勘詩集

春野醉吟十里程齋宮潛詠萬人驚  
今宵不寐到明讀風雨曉聞開鐮聲

題長慶四年歷日尾

殘歷半張餘十四灰心雪鬢兩淒然  
定知新歲御樓後從此不知長慶年

夜宴南陵留別

李嘉祐

雪滿前庭月色閒主人留客未能還  
預愁明日相思處匹馬千山與萬山



題前溪館

兩年謫官在江西舉目雲山要自迷  
今日始知風土異潯陽南去鷓鴣啼

過烏江公山寄錢起

雨過青山猿呌時愁人淚點石榴枝  
無端王事還相繫腸斷蒹葭君不知

王舍人竹樓

傲吏身閒笑五侯西江取竹起高樓  
南風不用蒲葵扇

紗帽閒眠對水鷗

韋潤州後亭海榴

江上年年小雪遲  
年光獨報海榴知  
寂寂山城風日暖  
謝公含笑向南枝

送崔十一弟歸北京

潘郎美貌謝公詩  
銀印花驄年少時  
楚地江皋一為別  
晉山沙水獨相思

訪韓司空不遇

圖畫風流似伯康  
文詞體格效陳王  
蓬萊對去歸常晚  
叢雀閒飛滿夕陽

虔上人竹房

詩思禪心共竹閒  
任他流水向人間  
手持如意高窓裏  
斜日沿江千萬山

木芙蓉

水面芙蓉秋已衰  
繁條到是著花時  
平明露滴垂紅臉  
似有朝愁暮落悲

袁江口憶王郎中

京華不啻三千里客淚如今一萬雙  
若個最為相憶處青風黃竹入袁江

柳

韓琮

折柳歌中得翠條遠移金殿種青霄  
上陽宮女含聲送不忍先歸舞細腰


楊柳枝

梁苑隋堤事已空萬條猶帶舊春風  
那堪更想千年後

欽定四庫全書

萬首唐人絕句  
卷十

誰見楊花入漢宮



萬首唐人絕句卷十

欽定四庫全書

集部

萬首唐人絕句卷十一至  
四

詳校官庶吉士臣柳邁祖

助教臣常循覆勘

總校官編修臣王燕緒

校對官編修臣勵守謙

謄錄監生臣何大士

欽定四庫全書

萬首唐人絕句卷十一

宋 洪邁 編

七言

春題華陽觀

白居易

帝子吹簫逐鳳皇  
空留仙洞號華陽  
落花何處堪惆悵  
頭白宮人掃影堂

秋雨中贈元九

不堪紅葉青苔地又是涼風暮雨天莫怪獨吟秋思苦  
比君較近二毛年

城東閑遊

寵辱憂歡不到情任他朝市自營營獨尋秋景城東去  
白鹿原頭信馬行

華陽觀桃花時招李六拾遺飲

華陽觀裏仙桃發把酒看花心自知爭忍閒時不同醉  
明朝後日即空枝



洛中春感

莫悲金谷園中月莫歎天津橋上春  
若學多情尋往事人間何處不傷神

寄陸補闕

前年同登科

忽憶前年科第後此時雞鶴暫同羣  
秋風惆悵須吹散雞在中庭鶴在雲

華陽觀中八月十五日夜招友翫月

人道中秋明月好欲邀同賞意如何  
華陽洞裏秋壇上

今夜清光此處多

曲江憶元九

春來無伴閒遊少  
行樂三分減二分  
何況今朝杏園裏  
閒人逢盡不逢君

過劉三十二故宅

不見劉君來近遠  
門前兩度滿枝花  
朝來惆悵宣平過  
柳巷當頭第一家

下邳莊南桃花

村南無限桃花發  
唯我多情獨自來  
日暮風吹紅滿地  
無人解惜為誰開

三月三十日題慈恩寺

慈恩春色今朝盡  
盡日徘徊倚寺門  
惆悵春歸留不得  
紫藤花下漸黃昏

看渾家牡丹花戲贈李二十

香勝燒蘭紅勝霞  
城中最數令公家  
人人散後君須看  
歸到江南無此花

戲題新栽薔薇

移根易地莫憔悴  
野外庭前一種春  
少府無妻春寂寞  
花開將爾當夫人

酬王十八李太見招遊山

自憐幽會心期阻  
復愧嘉招書信頻  
王事牽身去不得  
滿山松雪屬他人

縣南花下醉中留劉五

百歲幾回同酩酊  
一年今日最芳菲  
願將花贈天台女

留取劉郎到夜歸

宿楊家

楊氏弟兄俱醉卧披衣獨起下高齋夜深不語中庭立  
月照藤花影上階

醉中留別楊六兄弟

春初攜手春深散無日花間不醉狂別後何人堪共醉  
猶殘十日好風光

醉中歸藍屋

金光門外昆明路半醉騰騰信馬回數日非關王事繫  
牡丹花盡始歸來

遊雲居寺贈穆三十六地主

亂峯深處雲居路共踏花行獨惜春勝地本來無定主  
大都山屬愛山人

和王十八薔薇澗花時有懷蕭侍御兼見贈

霄漢風塵俱是繫薔薇花萎故山深憐君獨向澗中立  
一把紅芳三處心

再因公事到駱口驛

今年到時夏雲白  
去年來時秋樹紅  
兩度見山心有愧  
皆因王事到山中

期李十二文略王十八質夫不至獨宿仙遊寺  
文略也從牽吏役質夫何故戀囂塵始知解愛山中宿  
千萬人中無一人

酬趙秀才贈新登科諸先輩

莫羨蓬萊鸞鶴侶  
道成羽翼自生身  
看君名在丹臺者

盡是人間修道人

過天門街

雪盡終南又欲春  
遙憐翠色對紅塵  
千車萬馬九衢上  
回首看山無一人

惜玉藥花有懷集賢王校書起

芳意將闌風又吹  
白雲離葉雪辭枝  
集賢讎校無閒日  
落盡瑤花君不知

重到毓材宅有感



欲入中門淚滿巾  
庭花無主兩回春  
軒窗簾幕皆依舊  
只是堂前欠一人

亂後過流溝寺

九月徐州新戰後  
急風殺氣滿山河  
唯有流溝山下寺  
門前依舊白雲多

歎髮落

多病多愁心自知  
行年未老髮先衰  
隨梳落去何須惜  
不落終須變作絲

留別吳七正字

成名共記甲科上  
署吏同登芸閣間  
唯是塵心殊道性  
秋蓬常轉水長閒

邯鄲至除夜思家

邯鄲驛裏逢冬至  
抱膝燈前影伴身  
想得家中夜深坐  
還應說著遠行人

感故張僕射諸妓

黃金不惜買蛾眉  
揀得如花三四枝  
歌舞教成心力盡

一朝身去不相隨

遊仙遊山

閣將心地出人間五六年來人怪閒  
自嫌戀著未全盡猶愛雲泉多在山

見尹公亮新詩

袖裏新詩十首餘吟看句句是瓊琚  
如何持此將干謁不及公卿一字書

長安閒居

風竹松烟畫掩闕意中長似在深山  
無人不怪長安住  
何獨朝朝暮暮閒

祕書省中憶舊山

厭從薄宦校青簡  
悔別故山思白雲  
猶喜蘭臺非傲吏  
歸時應免動移文

江南送北客因憑寄徐州兄弟書

故園望斷欲何如  
楚水吳山萬里餘  
今日因君訪兄弟  
數行鄉淚一封書

長安正月十五日

喧喧車騎帝王州  
羈病無心逐勝遊  
明月春風三五夜  
萬人行樂一人愁

宿桐廬館同崔存度醉後作

江海漂漂共旅遊  
一樽相勸散窮愁  
夜深醒後愁還在  
雨滴梧桐山館秋

寒食月夜

風香露重梨花濕  
草舍無燈愁未入  
南鄰北里歌吹時

獨倚柴門月中立

晚秋閒居

地僻門深少送迎  
披衣閒坐養幽情  
秋庭不掃攜藤杖  
閒踏梧桐黃葉行

為薛台悼亡

半死梧桐老病身  
重泉一念一傷神  
手攜稚子夜歸院  
月冷房空不見人

途中寒食

路旁寒食行人盡，獨占春愁在路旁。  
馬上垂鞭愁不語，風吹百草野田香。

題流溝寺古松

烟葉蔥蘢蒼麈尾，霜皮駁落紫龍鱗。  
欲知松老看麈壁，死却題詩幾許人。

代鄰叟言懷

人生何事心無定，宿昔如今意不同。  
宿昔愁身不得老，如今恨作白頭翁。

欽定四庫全書

萬首唐人絕句  
卷十一

九

寄湘靈

淚眼凌寒凍不流，每經高處即回頭。  
遙知別後西樓上，應凭欄干獨自愁。

冬至宿楊梅館

十一月，中長至，夜三千里外，遠行人若為獨宿楊梅館。  
冷枕單牀一病身。

臨江送夏瞻

悲君老別我，霑巾七十無家萬里身。  
愁見舟行風又起。



白頭浪裏白頭人

冬夜示敏巢

爐火欲消燈欲盡  
夜長相對百憂生  
他時諸處重相見  
莫忘今宵燈下情

及第後憶舊山

偶獻子虛登上第  
却吟招隱憶中林  
春羅秋桂莫惆悵  
縱有浮名不繫心

題窓竹

不用裁為鳴鳳管不須截作釣魚竿  
千花百草凋零後  
留向紛紛雪裏看

花下自勸酒

酒盞酌來須滿滿花枝看即落紛紛  
莫言三十是年少  
百歲三分已一分

題李十一東亭

相思夕上松臺立蛩思蟬聲滿耳秋惆悵  
東亭風月好  
主人今夜在鄜州

重尋杏園

忽憶芳時頻酩酊却尋醉處重徘徊  
杏花結子春深後誰解多情又獨來

曲江獨行

獨來獨去何人識  
廐馬朝衣野客心  
閒愛無風水邊坐  
楊花不動樹陰陰

同李十一醉憶元九

花時同醉破春愁  
醉折花枝作酒籌  
忽憶故人天際去

計程今日到梁州

同錢員外題絕糧僧

三十年來坐對山  
唯將無事化人間  
齋時往往聞鐘笑  
一食何如不食閒

絕句代書贈錢員外

欲尋秋景閒行去  
君病多慵我興孤  
可惜今朝山最好  
強能騎馬出來無

禁中九日對菊花酒憶元九

賜酒盈杯誰共持  
宮花滿把獨相思  
相思只傍花邊立  
盡日吟君詠菊詩

答張籍

憐君馬瘦衣裘薄  
許到江東訪鄙夫  
今日正閒天又暖  
可能扶病暫來無

曲江早春

曲江柳條漸無力  
杏園伯勞初有聲  
可憐春淺遊人少  
好傍池邊下馬行

見元九悼亡詩

夜淚闇銷明月幌  
春腸遙斷牡丹庭  
人間此病治無藥  
唯有楞伽四卷經

寒食夜

無月無燈寒食夜  
夜深猶立闇花前  
忽因時節驚年幾  
四十如今欠一年

杏園花落時招錢員外同醉

花園欲去去應遲  
正是風吹狼籍時  
近西數樹猶堪醉

半落春風半在枝

同錢員外禁中夜直

宮漏三聲知半夜好風涼月滿松筠此時閒坐寂無語  
藥樹影中唯兩人

禁中夜作書與元九

心緒萬端書兩紙欲封重讀意遲遲五聲宮漏初明後  
一點窓燈欲滅時

寄陳式五兄

年來白髮兩三莖  
憶別君時髭未生  
惆悵料君應滿鬢  
當初是我十年兄

送元八歸鳳翔

莫道岐州三日程  
其如風雪一身行  
與君況是經年別  
暫到城來又出城

雨雪放朝因懷微之

歸騎紛紛滿九衢  
放朝三日為泥塗  
不知雨雪江陵府  
今日排衙得免無



詠懷

歲去年來塵土中  
眼看變作白頭翁  
如何辦得歸山計  
兩頃村田一畝宮

酬錢員外雪中見寄

松雪無塵小院寒  
閉門不似住長安  
煩君想我看心坐  
報道心空無可看

獨酌憶微之

獨酌花前醉憶君  
與君春別又逢春  
惆悵銀杯來處重

不曾盛酒勸閒人

微之宅殘牡丹

殘紅零落無人賞  
雨打風摧花不全  
諸處見時猶悵望  
況當元九小亭前

酬王十八見寄

秋思太白峯頭雪  
晴憶仙遊洞口雲  
未報皇恩歸未得  
慙君為寄北山文

和錢員外青龍寺上方望舊山

舊峯松雪舊溪雲  
悵望今朝遙屬君  
共道使臣非俗吏  
南山莫動北山文

惜牡丹花二首

惆悵堦前紅牡丹  
晚來唯有兩枝殘  
明朝風起應吹盡  
夜惜衰紅把火看

寂寞萎紅低向雨  
離披破豔散隨風  
清明落地猶惆悵  
何況飄零泥土中

答元奉禮同宿見贈

相逢俱歎不閒身  
直日常多齋日頻  
曉鼓一聲分散去  
明朝風景屬何人

和元九駱口驛舊題詩

拙詩在壁無人愛  
烏污苔侵文字殘  
唯有多情元侍御  
繡衣不惜拂塵看

山枇杷花二首

萬重青嶂蜀門口  
一樹紅花山頂頭  
春盡憶家歸未得  
低紅如解替君愁

葉如裙色碧綃淺花似芙蓉紅粉輕若使此花兼解語  
推囚御史定違程

亞枝花

山郵花木似平陽愁殺多情驄馬郎還似昇平池畔坐  
低頭向水自看粧

江上笛

江上何人夜吹笛聲聲似憶故園春此時聞者堪頭白  
況是多愁少睡人

嘉陵夜有懷二首

露濕牆花春意深  
西廊月上半牀陰  
憐君獨卧無言語  
惟我知君此夜心

不明不闇朧朧月  
非暖非寒慢慢風  
獨卧空牀好天氣  
平明閒事到心中

夜深行

百牢關外夜行客  
三殿角頭宵直人  
莫道近臣勝遠使  
其如同是不閒人

望驛臺

靖安宅裏當窓柳望驛臺前撲地花  
兩處春光同日盡  
居人思客客思家

江岸梨花

梨花有思緣和葉一樹江頭惱殺君  
最似嬌閨年少婦  
白粧素袖碧紗裙

寄上大兄

秋鴻過盡無書信病戴紗巾強出門  
獨上荒臺東北望

日西愁立到黃昏

寄內

桑條初綠即為別  
柿葉半紅猶未歸  
不如村婦知時節  
解為田夫秋擣衣

歎元九

不入城門來五載  
同時班列盡官高  
何人牢落猶依舊  
唯有江陵元士曹

得袁相書



穀苗深處一農夫面黑頭斑手把鋤何意使人猶識我就田來送相公書

遊悟真寺山下別張殷衡

世緣未了住不得孤負青山心共知愁君又入都門去即是紅塵滿眼時

病中得樊大書

荒村破屋經年卧寂絕無人問病身唯有東鄰樊著作至今書信尚殷勤

開元九詩書卷

紅牋白紙兩三束半是君詩半是書經年不展綠身病  
今日開看生蠹魚

夜坐

庭前盡日立到夜燈下有時坐徹明此情不語何人會  
時復長吁三兩聲

暮立

黃昏獨立佛堂前滿地槐花滿樹蟬大抵四時心總苦

就中腸斷是秋天

村夜

霜草蒼蒼蟲切切  
村南村北行人絕  
獨出前門望野田  
月明蕎麥花如雪

聞蟲

聞蟲唧唧夜綿綿  
況是秋陰欲雨天  
猶恐愁人慙得睡  
聲聲移近卧牀前

寒食夜有懷

寒食非長非短夜春風不熱不寒天可憐時節堪相憶  
何況無燈各早眠

萬首唐人絕句卷十一